

## **MALAYSIA DEBT VENTURES BERHAD**

---

### **Perkara Utama**

#### **Apa yang diaudit?**

- Malaysia Debt Ventures Berhad (MDV) ditubuhkan pada 23 April 2002 di bawah Akta Syarikat 1965 [*Akta 125*] sebagai Syarikat Berhad Menurut Syer.
- Setakat 31 Disember 2021, MDV mempunyai modal berbayar berjumlah RM500 juta dengan majoriti saham dimiliki oleh Menteri Kewangan (Diperbadankan) [MKD]. MDV dipertanggungjawabkan kepada Kementerian Sains, Teknologi dan Inovasi (MOSTI). MDV diberi mandat sebagai pembiaya kewangan kepada semua syarikat/projek/kontrak berasaskan teknologi.
- Prestasi aktiviti yang dinilai ialah pencapaian output dan pencapaian keberhasilan. Pencapaian output dinilai berdasarkan pencapaian petunjuk prestasi utama (KPI) korporat serta prestasi penggunaan dan pembayaran dana pembiayaan. Pencapaian keberhasilan pula dinilai berdasarkan pencapaian impak pembiayaan, pencapaian rancangan korporat/pelan strategik dan pembayaran dividen kepada pemegang saham.
- Pengurusan aktiviti pula dinilai berdasarkan pengurusan dan pemantauan kemudahan pembiayaan. Pengurusan kemudahan pembiayaan meliputi penggredan risiko kredit dan *Notice of Assignment* (NoA) manakala pemantauan kemudahan pembiayaan meliputi kutipan bayaran balik pembiayaan, *non-performing financing* (NPF) dan hapus kira hutang lapuk.
- Penilaian dijalankan terhadap sembilan aspek amalan terbaik tadbir urus korporat bagi tahun 2019 hingga 2022.
- Analisis kedudukan kewangan dijalankan terhadap penyata kewangan beraudit tahun 2019, 2020 dan 2021.

#### **Mengapa ia penting untuk diaudit?**

- Menilai tahap pencapaian objektif penubuhan MDV melalui aktiviti utama iaitu menyediakan kemudahan pembiayaan kepada syarikat/projek/kontrak yang berasaskan teknologi.
- MDV memperoleh modal dana pembiayaan menerusi pinjaman berjumlah RM2.144 bilion dan geran berjumlah RM88.90 juta untuk melaksanakan operasi syarikat dengan RM2.143 bilion telah digunakan untuk tujuan penyaluran pembiayaan.

#### **Apa yang ditemui Audit?**

- Secara keseluruhannya, MDV telah mencapai objektif penubuhannya melalui aktiviti menyediakan pembiayaan kepada syarikat/projek/kontrak yang berasaskan teknologi. Namun, penilaian sama ada projek yang dibiayai mencapai objektif tidak

dapat ditentukan kerana tiada mandat khusus untuk MDV melaksanakan penilaian tersebut.

- Sasaran KPI korporat bagi tempoh tahun 2019 hingga 2021 telah dicapai namun sasaran tahun 2022 tidak tercapai dengan pencapaian 78.3% berbanding 80%.
- Prestasi penggunaan dan pembayaran dana pembiayaan adalah memuaskan kerana dana telah diperoleh, diguna/dialurkan dan dibayar balik.
- Pencapaian keberhasilan meliputi pencapaian rancangan korporat/pelan strategik dan pembayaran dividen kepada pemegang saham adalah memuaskan. Namun, pencapaian impak pembiayaan tidak dapat ditentukan pada peringkat MDV.
- Pengurusan kemudahan pembiayaan didapati:
  - pengurusan penggredan risiko kredit adalah cekap kerana permohonan dinilai mengikut polisi; dan
  - pengurusan NoA adalah kurang cekap kerana terdapat kelemahan MDV yang membolehkan satu syarikat mengubah pernyataan NoA untuk kepentingannya menyebabkan kepentingan MDV tidak dilindungi dan mengalami kerugian sebanyak RM18.60 juta bagi tahun kewangan berakhir 31 Disember 2022.
- Pemantauan kemudahan pembiayaan didapati:
  - pengurusan kutipan bayaran balik pembiayaan adalah kurang cekap kerana notis peringatan tidak dikeluarkan atau lewat dikeluarkan antara dua hingga 17 hari kepada peminjam;
  - pengurusan NPF adalah kurang cekap kerana *gross NPF/gross impaired financing* (GIF) bagi tahun 2019, 2021 dan 2022 tidak mencapai sasaran ditetapkan; dan
  - pengurusan hapus kira hutang lapuk adalah kurang cekap kerana hanya 66.7% sampel akaun mematuhi asas bagi menurunkan nilai atau hapus kira akaun NPF.
- Amalan tadbir urus korporat MDV berada pada tahap memuaskan. Lima daripada sembilan aspek tidak diamalkan sepenuhnya iaitu Lembaga Pengarah; Setiausaha Syarikat; Jawatankuasa Audit; rancangan korporat/pelan strategik; dan prosedur operasi standard.

### **Apa yang disyorkan Audit?**

- Pihak yang berkepentingan perlu memberi pertimbangan terhadap syor berikut:
  - menetapkan sasaran impak sektor teknologi di peringkat syarikat supaya prestasi pencapaian dapat diukur dan membentangkan pencapaian rancangan korporat/pelan strategik kepada Lembaga Pengarah untuk pemantauan;

- MOF memainkan peranan dalam memastikan kepentingan Kerajaan terjaga seperti pembayaran dividen selaras dengan pelaburan yang dikeluarkan oleh Kerajaan;
- mematuhi gred minimum sebagai syarat kelulusan pembiayaan serta mengeluarkan notis peringatan bayaran balik kepada peminjam mengikut tempoh untuk mengurangkan risiko akaun peminjam menjadi NPF;
- memastikan semakan secara teliti terhadap NoA sebelum kelulusan dan menambah baik SOP Penyaluran Pembiayaan dengan menguatkuasakan kaedah pemfaktoran seperti ditetapkan dalam Pekeliling Perbendaharaan Malaysia PK6 Kemudahan Pembiayaan dalam Perolehan Kerajaan;
- menyusul hingga selesai kes penyalahgunaan NoA yang melibatkan dana berjumlah RM17.10 juta yang masih tertunggak;
- memastikan asas hapus kira dipatuhi sebelum menghapus kira akaun NPF; dan
- memantapkan amalan tadbir urus korporat dalam aspek latihan kepada ahli Lembaga Pengarah, peranan Setiausaha Syarikat serta perjumpaan Jawatankuasa Audit dengan Ketua Audit Dalam tanpa pengurusan syarikat.